

MOCIÓN SOBRE O SOBRECUSTE DOS GASTOS DE LIMPEZA E DESINFECCIÓN DOS CENTROS EDUCATIVOS DE TITULARIDADE AUTONÓMICA PARA OS CONCELLOS

EXPOSICIÓN DE MOTIVOS

Nas instrucións aprobadas polo Consello Interterritorial do Sistema Nacional de Saúde Pública (DOG nº 174 bis, de data 28/08/2020), e na actualización das recomendacións sanitarias do Comité Clínico ao Protocolo de data 22 de xullo, de adaptación ao contexto da COVID-19 nos centros de ensinanza non universitaria de Galicia (versión do documento a 31/08/2020), no que atinxe ás medidas xerais de limpeza e desinfección dos sinalados centros educativos de titularidade autonómica, impóñense unha serie de obrigas mínimas, que serán reflectidas nos Protocolos que deben de aprobarse por cada centro educativo, pasando deste xeito a formar parte do chamado "*Plan de Adaptación á Situación COVID-19 no curso 2020/2021*".

O obxecto do sinalado Protocolo é crear un entorno escolar saudable e seguro, atopándonos en consecuencia ante medidas de **carácter sanitario** e tamén de **carácter educativo**.

Tras numerosas queixas e dúbidas trasladadas á Deputación Provincial de A Coruña por moitos alcaldes e alcaldesas, e co obxectivo de aclarar se os traballos de limpeza e desinfección dos centros educativos de titularidade autonómica corresponde á Administración Autonómica ou aos Concellos, polo Presidente da Deputación encargouse ao servizo de Asesoría Xurídica do ente provincial a elaboración dun informe.

Este informe conclúe que a competencia de limpeza e desinfección dos colexios para cumprir cos protocolos de prevención da COVID-19, correspóndelle á Xunta de Galicia. Do sinalado informe, en síntese, derívase o seguinte:

Ao respecto das **medidas sanitarias** "*a competencia sanitaria está regulada, na actualidade na Lei 8/2008, de 10 de xullo, de Saúde de Galicia, cuxo artigo 48 non deixa lugar a dúbida cando establece que, entre as prestacións de saúde pública, atópase a prevención e control das enfermidades transmisibles*" (apartado d)). "*Dado que o propio documento que contén as Instrucións da Xunta, reflicte que, ditas medidas de limpeza e desinfección teñen como*

finalidade, precisamente, a prevención e control dunha enfermidade transmisíbel, a infección respiratoria causada polo SARS-CoV-2, estamos ante unha medida de saúde pública, que debe ser debidamente implantada pola administración sanitaria competente, que, neste caso, é claro, é a Autónoma”.

A máis abundamento, é de resaltar que, “nin a normativa de ámbito local, nin a Ley de Saúde de Galicia (art. 80), atribúen competencia algunha en materia de sanidade a favor das entidades locais, en relación á implantación e execución das que medidas que, no ámbito de saúde pública, se adopten pola CCAA”.

E conclúe o informe que “o control sanitario atribuído aos concellos, atendendo á literalidade da norma autónoma, debe encuadrarse nunha mera función de vixilancia do territorio do municipio e da súa poboación, ao tratarse da administración de maior proximidade, pero en modo algún este control pode implicar a adopción de medidas específicas, que van máis aló dunha limpeza ordinaria”.

No que atinxe ó **ámbito educativo**, razoa o informe xurídico, a normativa vixente opera a transferencia de competencias na devandita materia, a favor da CCAA de Galicia.

Ao abeiro da regulación contida na Lei Orgánica de Educación e na Lei das Bases do Réxime Local, o deber de conservación de centros de educación infantil, primaria e especial corresponderá só aos concellos, cando éstos ostenten a titularidade deses centros; correspondendo ditas funcións á administración autónoma, nos centros de titularidade autónoma.

Agora ben, no caso de que “o lexislador autónomo optara, no exercicio das súas competencias, por ampliar as competencias das corporacións locais, respecto á conservación e mantemento dos centros escolares - coa inherente carga financeira que esta ampliación conlevaría - a CCAA deberá por a disposición das entidades locais, a correspondente provisión de medios económicos, materiais e persoais para o exercicio das mesmas, de conformidade coo art. 7 y 27 de la LBRL”.

En definitiva, non pode máis que concluirse que “en modo algún pode encomendarse ás entidades locais novas funcións e responsabilidades na conservación e mantemento dos centros escolares, independentemente da titularidade dos mesmos, sen a correspondente consignación orzamentaria para sufragar ditos gastos, e sen a correspondente delegación de tal competencia, pois o contrario supón unha vulneración da autonomía local constitucionalmente garantizada, así como unha infracción da normativa

básica estatal, en materia de educación e de regulación das bases das entidades locais”.

Por outra banda, cabe recordar, que a Xunta de Galicia foi perceptora de case 93 millóns de euros por parte do Estado, precisamente, para adaptar os centros educativos á situación actual de pandemia; cando, na realidade, son os propios Concellos os que están a soportar o importante sobrecoste que o exercicio dunha competencia que non lles corresponde, lles está a ocasionar.

Concretamente no Caso do Concello de Ames, vímonos na obriga de reforzar a limpeza e desinfección dos nosos centros para dese xeito dar cumprimento aos protocolos establecidos pola Xunta.

Polo exposto, O Grupo Municipal Socialista de Ames solicita ó Pleno da Corporación Municipal a adopción do seguinte acordo:

- 1.- Instar á Xunta de Galicia a cumprir coas súas obrigas e responsabilidades no ámbito sanitario e educativo, dispoñendo dos medios materiais e persoais e dos recursos económicos que sexan precisos para garantir que a volta a clase e o curso académico poida desenvolverse de maneira presencial, segura e con calidade.**
- 2.- No caso de que a Xunta de Galicia decida encomendar as entidades locais novas función e responsabilidades en materia de conservación e mantemento dos centros educativos, proceda a delegación formal das mesmas e realice a correspondente consignación orzamentaria para sufragar tales gastos.**
- 3.- Instar á Xunta de Galicia a que proceda á compensación dos sobrecustes que os concellos están a soportar como consecuencia dos gastos de limpeza e desinfección dos centros educativos.**

Asinado por Blas García Piñeiro, voceiro Grupo Municipal Socialista na data que consta na sinatura dixital.